

Na osnovu člana 16. Zakona o upravi („Službeni glasnik Bosne i Hercegovine“, broj 32/02 i 102/09), člana 49. alineja 5. i člana 51. Okvirnog zakona o visokom obrazovanju („Službeni glasnik Bosne i Hercegovine“, broj 59/07 i 59/09), člana 7. i člana 12. Statuta Agencije za razvoj visokog obrazovanja i osiguranje kvaliteta („Službeni glasnik Bosne i Hercegovine“, broj 86/09), direktor Agencije za razvoj visokog obrazovanja i osiguranje kvaliteta, uz saglasnost Upravnog odbora sa ___sjednice održane_____ godine, *d o n o s i*

INSTRUKCIJU O NAČINU DAVANJA PREPORUKE O AKREDITACIJI VISOKOŠKOLSKIH USTANOVA I STUDIJSKIH PROGRAMA

Član 1. (Predmet)

Ovom instrukcijom propisuje se način davanja preporuke nadležnim obrazovnim vlastima o ishodu akreditacije visokoškolskih ustanova, odnosno studijskih programa na osnovu mišljenja komisije stručnjaka koji daju ocjenu i obavljaju reviziju kvaliteta i daju preporuke o akreditaciji visokoškolskih ustanova i studijskih programa u Bosni i Hercegovini.

Član 2. (Svrha preporuke)

Svrha preporuke o akreditaciji je osiguravanje koherentnosti i dosljednosti tumačenja standarda i kriterija, a s obzirom na to da evaluacije provode različite grupe stručnjaka.

Član 3. (Komisija za davanje preporuke)

- (1) Preporuku o ishodu akreditacije visokoškolskih ustanova, odnosno studijskog programa predlaže Komisija za davanje preporuke o akreditaciji visokoškolskih ustanova, odnosno studijskih programa (u daljem tekstu: Komisija).
- (2) Komisija se sastoji od tri stalna i tri zamjenska člana i čine je državni službenici iz Agencije.
- (3) Komisiju imenuje direktor.
- (4) Komisija se imenuje na mandat od godinu dana uz mogućnost ponovnog imenovanja.
- (5) U slučaju spriječenosti nekog od stalnih članova Komisije ili postojanja sukoba interesa, stalne članove će zamijeniti imenovani zamjenski članovi.
- (6) Pod sukobom interesa u smislu stava (5) ovog člana, smatra se (prethodni ili trenutni) angažman na konkretnoj ustanovi koja je predmet izdavanja preporuke

Član 4. (Zadatak komisije)

- (1) Komisija će tumačiti standarde i kriterije u svjetlu principa Evropskog prostora visokog obrazovanja i generalno dobrih praksi u oblasti osiguranja kvaliteta.
- (2) Zadatak Komisije je da, nakon prijema izvještaja komisije stručnjaka, na temelju pregleda izvještaja, ocijeni da li je izvještaj napisan u skladu sa Odlukom o normama kojima se

određuju minimalni standardi u području visokog obrazovanja i Odlukom o kriterijima za akreditaciju visokoškolskih ustanova u BiH.

- (3) Zadatak Komisije je da, na osnovu izvještaja komisije stručnjaka, ocijeni da li su sudovi izneseni od strane komisije stručnjaka dosljedni, koherentni i u skladu sa dobrom praksom u oblasti osiguranja kvaliteta i principima koji vladaju u Evropskom prostoru visokog obrazovanja

Član 5. (Prijedlog Komisije)

- (1) Komisija daje prijedlog za izdavanje preporuke direktoru Agencije na osnovu mišljenja komisije stručnjaka, i to:
 - a) Preporuke o akreditaciji visokoškolske ustanove ili studijskog programa, ako je mišljenje komisije stručnjaka da se visokoškolska ustanova/studijski program treba akreditirati;
 - b) Preporuke o izdavanju uslovne akreditacije, odnosno upućivanja pisma očekivanja, ako je mišljenje komisije stručnjaka da se visokoškolska ustanova/studijski program treba uslovno akreditirati;
 - c) Preporuke o donošenju rješenja o odbijanju akreditacije, ako je mišljenje komisije stručnjaka da se visokoškolska ustanova/studijski program ne akreditira
- (2) Komisija je dužna da u roku od 10 dana od prijema zahtjeva za izdavanje preporuke dostavi prijedlog iz stava 1) direktoru Agencije.
- (3) U slučaju da Komisija, iz razloga predviđenih u članu 7 Instrukcije, nije u mogućnosti dostaviti prijedlog u roku iz prethodnog stava, dužna je o tome obavijestiti direktora pisanim putem.

Član 6. (Sadržaj preporuke)

- (1) Preporuka sadrži sljedeće:
 - a) uvodni dio koji pojašnjava svrhu preporuke,
 - b) preporuke po kriterijima koje se odnose na svaki kriterij,
 - c) zaključak kojim se preporuke samo rezimiraju i daje sveukupna preporuka za akreditaciju.
- (2) U slučaju kada komisija stručnjaka dostavlja izvještaj direktno Agenciji, Agencija će uz preporuku nadležnoj obrazovnoj vlasti dostaviti kopiju izvještaja komisije stručnjaka u kojem su sadržane preporuke za poboljšanje i unaprjeđenje unutrašnjeg kvaliteta koje je komisija stručnjaka dala visokoškolskoj ustanovi.
- (3) Preporuku o akreditaciji, uslovnoj akreditaciji ili odbijanju akreditacije visokoškolske ustanove/studijskog programa na osnovu prijedloga iz člana 5. ove Instrukcije donosi direktor Agencije u roku od 5 dana od dana prijema prijedloga Komisije.

Član 7. (Izdavanje preporuke suprotne mišljenju komisije stručnjaka i traženje pojašnjenja)

- (1) Agencija može dati preporuku suprotnu nalazu komisije stručnjaka samo u slučaju da se ocijeni da komisija stručnjaka kriterije nije primijenila i tumačila na dosljedan način. U tom slučaju Komisija mora suštinski opravdati i obrazložiti zašto je došla do drugačijeg zaključka za svaki kriterij gdje mišljenje Agencije odstupa od nalaza komisije stručnjaka.

- (2) Agencija može od komisije stručnjaka zatražiti pojašnjenja ako izvještaj komisije stručnjaka ne daje na adekvatan način dovoljno informacija o jednom ili više kriterija.
- (3) Agencija će pojašnjenja tražiti putem nadležnih obrazovnih vlasti ako je izvještaj komisije stručnjaka zaprimila od njih ili direktno od komisije stručnjaka ako je komisija stručnjaka izvještaj poslala direktno Agenciji.

Član 8.
(Primjena Instrukcije)

Ova Instrukcija stupa na snagu danom donošenja, a objavljuje se u Službenom glasniku Bosne i Hercegovine.

Broj:
Datum:

Direktor

Doc.dr Husein Nanić

O B R A Z L O Ž E N J E

I - PRAVNI OSNOV ZA DONOŠENJE INSTRUKCIJE O NAČINU DAVANJA PREPORUKE O AKREDITACIJI VISOKOŠKOLSKIH USTANOVA I STUDIJSKIH PROGRAMA

Pravni osnov za donošenje Instrukcije sadržan je u odredbi člana 49. alineja 5. Okvirnog zakona o visokom obrazovanju u Bosni i Hercegovini („Službeni glasnik Bosne i Hercegovine“ broj 59/07 i 59/09) kojom je propisana nadležnost Agencije da daje preporuke nadležnim obrazovnim vlastima o akreditacije visokoškolskih ustanova i studijskih programa. Pored toga, članom 7. i članom 12. Statuta Agencije za razvoj visokog obrazovanja i osiguranje kvaliteta („Službeni glasnik Bosne i Hercegovine“, broj 86/09), propisano je da Agencija donosi propise iz svoje nadležnosti uz saglasnost Upravnog odbora Agencije.

II - RAZLOZI ZA DONOŠENJE PROPISA

Razlozi za donošenje Instrukcije o načinu davanja preporuke o akreditaciji visokoškolskih ustanova i studijskih programa proizlaze iz potrebe bližeg regulisanja načina davanja preporuke o akreditaciji kao jedne od osnovnih nadležnosti Agencije u oblasti akreditacije. S obzirom na potrebu da se utvrdi svrha same preporuke, kao i utvrdi jedinstven način davanja preporuke svim nadležnim obrazovnim vlastima o akreditaciji visokoškolskih ustanova i studijskih programa, Agencija je prepoznala nedostatke u dosadašnjem postupanju pri obavljanju jedne od osnovnih nadležnosti utvrđenih Okvirnim zakonom o visokom obrazovanju u BiH, jer alineja 5. člana 49. Zakona ne daje dovoljno uputstava za primjenu te odredbe, pa u tom smislu nalazi razloge za donošenje akta kojim će se bliže urediti način postupanja.

III - OBRAZLOŽENJE PREDLOŽENOG RJEŠENJA

Instrukcijom se najprije propisuje svrha preporuke koja ima za cilj osiguravanje koherentnosti i dosljednosti tumačenja standarda i kriterija, a s obzirom na to da evaluacije provode različite grupe stručnjaka. Nadalje instrukcija propisuje formiranje stalne komisije za davanje preporuke, kao i zamjenske članove iz reda državnih službenika u Agenciji, i to po dva državna službenika iz Sektora za osiguranje kvaliteta i po jedan državni službeni iz Sektora za razvoj visokog obrazovanja sa utvrđenim zadacima i rokovima za postupanje na način da Komisija po prijemu i uvidom u izvještaj komisije stručnjaka tumači standarde i kriterije u svjetlu principa Evropskog prostora visokog obrazovanja i generalno dobrih praksi u oblasti osiguranja kvaliteta, te daje prijedlog direktoru za davanje preporuke o akreditaciji, uslovnoj akreditaciji ili odbijanju akreditacije kao mogućim ishodima akreditacije, nakon čega direktor daje preporuku nadležnim obrazovnim vlastima.

Instrukcijom je u članu 6. propisan sadržaj preporuke koji je jednoobrazan i jednako primjenjiv za sve za sve, a obuhvata uvodni dio, preporuku i zaključak. U slučajevima kada stalna komisija za davanje preporuke ocijeni da komisija stručnjaka kriterije nije primijenila i tumačila na dosljedan način, može se dati preporuka suprotna mišljenju komisije stručnjaka, s tim da će se najprije zatražiti pojašnjenje izvještaja.

Instrukcija je opći akt koji, temeljem svojih nadležnosti utvrđenih u Okvirnom zakonu o visokom obrazovanju u BiH, donosi Agencija, a s obzirom na činjenicu da se Instrukcija tiče i javnosti u tom smislu što se preporuka daje nadležnim obrazovnim organima koji donose rješenje o akreditaciji visokoškolskih ustanova, objavljuje se u Službenom glasniku Bosne i Hercegovine.

